

**Patxi Lasa Etxezarreta** > Itxas-Argia kantari kanta

“Kantu-taldea sortu dugu kantuzaleak batu, ingurukoak alaitu eta gure kultura sustatzeko”



Taldeko argazkia, entsegetako batean

**Kantu-taldea sortu dute Itxas-Argia kultur elkartearen. Talde irekia da, edonork parte har dezake, kantatzen jakin edo ez. Hilean bitan elkartuko dira elkartearen egoitzan, entsegua egiteko, 19:00etan; eta hilean behin, Getxon eta Algortan erakutsiko dute entseguen emaitza, tabernaz taberna. Lau lagunek bultzatu dute ekimena, horien artean dago Patxi Lasa Etxezarreta. Elkarriketa egin genuen lehen entsegutik egun batzuetara eta badirudi indartsu hasi direla, izan ere, 27 lagun elkartu ziren. Zuzendari lanak egiten ditu Josu Landeta Egurrolak.**

—Lau lagunek bultzatu duzue taldea?  
—Taldea bat gaude horren atzean. Lau hasi ginen, Goio, Manu, Juan eta laurok; eta gero deitu genion Josu Landetari, zuzendari tekniko lana egiten du. Joan den barikuan egin genuen lehen entsegua eta 27 lagun elkartu ginen, hasieratik ekimen irekia da-eta.  
—Danak getxoztarrak?  
—Ingurukoak, bai. Hori da-eta asmoa, Andra Marin eta inguruan kanturako zaletasuna apur bat sustatzea.  
—Eta zergatik sortu duzue abesbatza?

—Kontuz, argi utzi gura dugu ez garela abesbatza, baizik eta kanta-taldea. Hau guztiz irekia da. Jende askok esaten digu ez dakiela abesten, eta ez da beharrezkoa. Hemen bakarrik behar dituzu kantatzeko zaletasuna eta jai-giroan ondo pasatzeko gogoia, baita euskal kulturaren inguruan lanketatxoa egitea ere. Helburu nagusietakoa da zabala izatea, etor dadila gura duena. Zertarako? Kantuzaleak batzeko, kantuen bitartez ingurukoak alaitzeko eta euskal kultura sustatzeko. Izan ere, gauza ez da bakarrik kantatzea: entseatzeko dituz-

gun kantuen inguruan lantzen dugu beren sorrera, egiletza, jatorria edota letren esanahia. Jai-giroan, ondo pasatu eta euskal kulturaren inguruan aurrera-pausotxo bat emotea, inolako handitasunik barik, baina bide horretan goaz.

**«Guztiz irekia da, bakarrik behar dira zaletasuna eta ondo pasatzeko gogoia»**

—Zelan sortu zitzaizuen talderako ideia?  
—Itxas-Argia elkartearen hainbat ekintza egiten dira, eta iaz, batzuk komentatzen ibili ginen kantu-talde bat egiteaz eta pentsatu genuen hurrengo ikasturtean hastea bultzatzen; eta horrela izan da. Plentziako Kantagune taldeagaz harremanetan ipini ginen, ibilbide luzea daukate-eta. Apur bat kopiatzen ari gara, behintzat gauza asko ikasten ari gara, asko laguntzen digute.  
—Eurak alde zaharrean aritzen dira kantari, antzeko asmoa daukazue?

—Bai, Algortan eta Andra Marin kantu-poteoa izango dugu hilean behin, tabernaz taberna. Entsegu bi dauzkagu hileroko, eta bigarrenaren ostean aterako gara kalera abestera.

—Euskal kantak dira errepertoriokoak?  
—Batez ere, baina ez gaude itxita beste nazioetako kantak egiteko. Gainera, gure kantutegia egiteko asmoa daukagu. Bertan sartu gura ditugu Uribe Kostako kantatuak ere, horren ezagunak ez direnak, jendeari aditzera emateko; eta aipatu legez, kanten historia ere ezagutarazteko. Zorionez, herri honetan kantarako zaletasun handia dago.

—Musikariak ere badauzkazue?  
—Josu Landetak soinu txikia daroa eta asmoa da apurka-apurka joatea: hurbiltzen direnen artean baten batek tresnaren bat jotzen badu, hurrengoan ekar beza. ○

## Bosteko, azkena Getxon Erakusketa ibiltariak Torrene aretoan amaituko du bidea, hilaren 10etik 28ra



Bizkaiko beste lau udalerriri bisitatu ditu erakusketak

**Alberto** Albor, Iranzu Antona eta Kepa Garraza artisten lanak erakutsi ditu aurtengo Bosteko erakusketa ibiltariak. Bizkaiko Foru Aldundiak antolatzen du eta bost udalerritan egin ohi da. Edizio hau Getxon amaituko da, Leioa, Basauri, Zornotza eta Arrigorriaga bisitatu ostean. Hiru artisten lanak Algortako Torrene aretoan egongo dira ikusgai, abenduaren 10etik 28ra bitartean.

Daborduko Bosteko egitasmoaren hamazazpi edizio antolatu dira eta, bere baitan, berrogeita hamar artista baino gehiagoren obrak aurkeztu dira. Kasu honetan, Alberto Albor eta Kepa Garraza pintoreak

dira, biak figuratiboak, baina estiloak apur bat desberdinak. Iranzu Antona, barriz, arlo transbertsalago batean mugitzen da: “Argazkilaritza, eskultura eta bideoa uztartuz paisaiari behatzeko begirada interesgarria egiten du”. Hiruren lanak batuz sortu dute *Sormena, berregitea eta kopia* izeneko erakusketa kolektiboa.

Antolatzaileek diotenez, asmoa da ikusle guztientzako erakusketa ulerterraza eta didaktikoa izatea eta, helburu nagusia, erakusketa aurkeztzen den Bizkaiko udalerritan euskal artista plastiko aintzatetsien obra ezagutzera emotea eta hedatzea. ○

Info+: [www.getxo.net](http://www.getxo.net)

## JCB INSTITUTUAN ERE EUSKARAGAZ BAT

Euskararen eguna dela-eta hainbat ekimen egiten ari dira Julio Caro Baroja institutuan. Idazle bigaz solasaldia izan da: batetik, Unai Elorriagak hitz egin du, *SPrako tranbia* eleberriri buruz; bestetik, Aitor Aranagak berba egin zuen *Hildakoen eremuan* liburuari buruz. Abenduaren 3rako, Euskararen Egunerako, erromeria eta herrikirolak antolatu dituzte. Hilaren 4rako, Jon Arretxe idazleak berbaldea emongo du *Hutsaren itzalak* liburuari buruz eta segidan Euskaragoa izango da. Amaitzeko, abenduaren 5ean, barikuagaz, Durangoko Azokara joango dira ikasleak.

Info+: [www.iesjcbarobjahi.hezkuntza.net](http://www.iesjcbarobjahi.hezkuntza.net)

## AHOBIEN GALA ETA ARGIA EREITEN SARIA

ALBE Algortako Bertso Eskolak Ahoabi sariak banatuko ditu, beste behin ere, Ahoabi Galaren baitan. Abenduaren 13an egingo da ekitaldia, 18:00etatik aurrera, Algortako kultur etxean. Besteak beste, bertso-eskolako gazteen antzezpen-ikuskitzuna eta ALBERTO-SAIOA egingo dira ekitaldiaren barruan. Gainera, askaria ere prestatuko du ALBEK. Bestalde, urtero legez, Getxoko Udalak Argia Ereiten euskara saria emongo du abenduaren 2an. Fadura kiroldegiko areto nagusian izango da ekitaldia, 20:00etan.

Info+: [www.getxo.net](http://www.getxo.net)

## GAIZKA BASALDUAREN HITZALDIA HILAREN 18AN

Urte honetako azken hitzaldia egingo du Bolibariar Ikaskuntza Elkarteak, noiz eta abenduaren 18an. 2014a amaitzeko, Gaizka Basaldua gonbidatu du berbaldea emateko eta ondoko gaiari buruz jardungo da: *La sociedad en marcha, Navarra como clave de movilización*. Ohi legez, Algortako kultur etxean izango da solasaldia, Villamonten. Arrastiko 19:00etan hasiko da. Elkarteagaz harremanetan ipini gura baduzu idatzi mezua: [bolibarikastaroa@gmail.com](mailto:bolibarikastaroa@gmail.com).

Info+: [www.bolibar.org](http://www.bolibar.org)

**lagusana**  
liburuak eta letra txikia

Basagoiti etorbidea 59  
(Tellagorri plaza)  
48991 ALGORTA  
Tf. 94 491 14 12  
[gusanalibreria@gmail.com](mailto:gusanalibreria@gmail.com)